

Transkription von Urkunde RIG 1383a

Ort, Datierung: Riga, 1383-11-11

Signatur: Staatsarchiv Riga, Fond 4038, Apparat 2, 1117 (Bl. 40r)

Inhalt: Lakenscherer: Schragen

IN den Jaren na godes bord dusent dre hundert dar na in deme dre vnde tachtentigsten iare vppe /
Sunthe mertens dagh So hebben de heren Borgermestere . vnde råd to Rige . vns lakenscherers /
bynnen Rige begnadiget mit ener schra . Vnde mit rechticheiden in vnseme ampte toholdende in /
desser wise hir na bescreuen . Tho deme irsten . So welk man synes sulues werden wil jn vnseme /
ampfte . de schal hebben dre mark Riges vngheborget . vnde een pār scheren . vnde schal de
borger=/schopp wynnen . vnde sin harnasch hebben to sinem lyue . Vortmer so schal he der cumpanie
gheue(n) / ene tu(n)nen bires . vnde ene mark wasses to eren lichten tohulpe . Vortmer so schal he een
half laken / scheren vppe des werkmesters dische . van enen brugeschen . Vortm(er) so schal he dre
lakene volden . / een ypersch . een Thomās . vnde een Cumesch . Vortm(er) so schal nema[n]¹ t in
vnser cumpanie meden / enen knecht êr sin mester mit eme gherekent heft to rechter tijd bi vier
marken wass(es) to vnser lichten tohulpe Vortm(er) welk man enen lerjunghen entfeid . de schal der
cumpanie gheue(n) ene tu(n)nen / bires . vnde de junghe schal wesen echt vnde recht gheboren . Ok so
shal nemant ene(n) vndutschen / leren jn vnseme ampte bi eneme haluen liuespu(n)d wass(es) to
vnser lichten . Werit ok dat hir een knecht / denen wolde jn vnseme ampte . de schal denen een gantz
iâr . Vortm(er) so schal vnser een deme andern nicht / to voruanghe wesen in vnseme werke bi eneme
halue(n) liuespu(n)d wass(es) to den lichten . Werit ok dat ener / bedderuen vrowen ere man affstorue
in vnseme ampte . de mach dat werk holden vp een iâr . Js et dat / se sick nicht vorandert binne(n)
deme jare na eres man(n)es dode So schal se des werkes entberen Werit ok / dat iemant in vnseme
ampfte storue . Also . man . wiff . ofte kind . So schal de gantze Cumpanie to der / bigraft komen . de
des nichten deyt de schal betern ene mark wass(es) . Vortmer wanner de cumpanie / to samene drinket
. vnde de irste beker vpkompt So schal dar nemant² clagen bi dren marken / wass(es) to vnser lichten
êr der rechten steuen tijd . Vortmer wan de cumpanie to samene gheid . vnde / de werkmester sitten
gheid . So schal een Jewelk man sin stekemest aflecghen . werit dat he des / nichten dede . vnde de
werkmester dat mest eschede . So schal he id deme werkmestere dôn . vnde / nicht weigheren . Also
vake alse he deme mestere dat mest weigherde to donde . So schal he betern / ene mark wass(es) to den
lichten , Vortmer welk man in vnseme werke sines sulues werdet lest . de / schal der cumpanie to
segghen . wente to der tijd dat een ander sines sulues werdet in vnseme / ampte . Bouen alle desse
artikele . vnde vorscreuene stucken So schal vnde wil de råd tho Righe / de ouersten hand hebben /

¹ n fehlt

² a aus e korrigiert